



Rätisches Museum
Museum retic
Museo retico

Direcziun/administraziun
Loëstrasse 26
Chascha postala
CH-7001 Cuira
Tel. 081 257 48 40
info@raetischesmuseum.gr.ch
www.raetischesmuseum.gr.ch

Cuira, ils 11 d'october 2012

Text d'infurmaziun per las medias

La liongia – ina istorgia cun dus pizs

dals 12 d'october 2012 fin ils 3 da mars 2013

La talgia da liongia regalada dal mazler cur ch'ins era uffant, la liongia da brassar sin il chartunet a la festa communal u la servela vi dal bastun sur il fieu – la liongia è mintgadi e luxus a medem temp, ella è memoria, individualitad ed experientscha collectiva. A quest bain cultural culinaric è deditgada la nova exposiziun speziala en il museum retic.

Il center da la part istorica-etnologica da l'exposiziun furma la batgaria da chasa tradiziunala. Cun agid da numerus objects da la collecziun dal museum retic sco er cun agid da fotografias vegni illustrà, co ch'i vegniva fatg batgaria pli baud sin ils bains purils. Ina staziun da sun che cuntegna regurdientschas raquintadas dat vita a quest eveniment spezial che steva sin il chalender da mintga famiglia da purs. Dasperas vegnan preschentadas anecdotas istoricas davart la liongia.

La segunda part da l'exposiziun mussa ch'ins po esser da different avis, cur ch'i va per la liongia. Co dumogn jau il fatg ch'in animal ha stui laschar sia pel per mia liongia? Nua e co ha vivì quest animal? Quant sauna è mia liongia? Ha mes consum da charn consequenzas per l'ambient? En intervistas curtas discurran in represchentant da la federaziun professiunala da charn, ina pura biologica, in furber vendider online da liongias ch'è oriund da Berlin ed in impressiunant vegetari da Greenpeace davart ils aspects critics dal consum da liongias.

La diversitad da las liongias da la Svizra vegn celebrada ad ina maisa festiva. Las visitadras ed ils visitaders pon sa tschentar a maisa e scuvrir chaussas interessantas e surpudentas davart las numerusas spezialitads da liongias.

L'exposiziun vegn cumplettada cun in'acziun da liongias d'art. Il museum retic ha envidà quatter artistas giuvnas ed artists giuvens dal Grischun a preschentar lur ovras davart il tema. Esther Schena, Madlaina Janett, Isabelle Meier e Remo Arpagaus mussan, en tge diversas modas che la liongia po inspirar l'art.

In program accumpagnant tar l'exposiziun speziala cuntegna ina vasta paletta d'occurrènzas «da tuttas sorts liongias». Durant suentermezdis da degustaziun preschentan differents mazlers grischuns lur spezialitads da liongias. Tgi che s'interessa pli detagliadamain co che las liongias vegnan fatgas, po experimentar quai en lavuratori. Quests lavuratori vegnan purschids er per uffants – ultra d'auters suentermezdis d'aventura davart il tema. La filarmonia da chombra dal Grischun envida ad in „Banchetto Musicale“ e la chasa editura hier+jetzt a „Wurstige Sonntagsfreuden“, in suentermezdi cun contribuziuns per tut ils senns. Er durant la sonda senza fin ans deditgain nus a la liongia: tant en il senn culinaric sco er tras la prelecziun da l'enconuscent satiricher tudestg Wiglaf Droste.

Ulteriuras infurmaziuns chattais Vus sut www.rm.gr.ch.

Contact: Andrea Kauer Loens
Manadra dal project per l'exposiziun speziala
tel. 081 257 48 30
andrea.kauer@rm.gr.ch